

Sauuages errants, on se met sous la conduite d'un de leur chef de famille, lequel a soing de vous nourrir & heberger comme son domestique, ou comme son enfant, car de se mettre au commun on ne seroit || pas 52 bien, & si on n'y pourroit subsister longuement, pour ce qu'ils se separent souuent pour la chasse, les uns d'un costé & les autres d'un autre, & par ainsi ne pouuant faire vostre cas à part, faudroit que mourussiez de faim ou que retournassiez avec les François.

Celuy avec lequel le P. Ioseph hyuerna se nommoit Choumin, qui signifie en langue Montagnatte un Raisin, les François l'appelloient le Cadet à cause qu'il est fort propre & net de sa personne, sent peu son sauuage, & rend tout le seruice qu'il peut aux François qu'il aymecordialement & veritablement, & non feintement ou avec dissimulation comme l'on faiet pour le iourdhuy.

Pendant cet hyuernement, la femme de Choumin accoucha d'un garçon qu'il voulut estre nommé Pere Ioseph, qui estoit le plus grand signe d'amitié qu'il eut pû temoigner à ce bon Pere, car en effect il l'aymoit de cœur & d'affection. Il luy dit doucement: Pere Ioseph mon frere (ainsi l'appelloit-il) voilà ma femme qui est accouchée d'un garçon, comment l'appellerons nous, ie voudrois bien qu'il se nommast Pere Ioseph. A quoy le Pere luy repartist qu'il vaudroit mieux qu'il luy donnast le nom de monsieur du Pont l'un des Capitaines & Chefs de la Traicte, qui seroit un bon moyen de se faire aymer de luy & de profiter en ses visites. Car disoit le Pere Ioseph, mon amitié t'est des-ia toute acquise & t'aymeray tousiours sans cette gratification, &